

MIŠLJENJE
po Zahtjevu privrednog subjekta JP Elektroprivreda BIH d.d. Sarajevo o obavezi podnošenja
prijave koncentracije

Sarajevo,
novembar 2016. godine

Broj: 01-26-7-017- 3 -I/16
Sarajevo, 10.11. 2016. godine

Na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu za mišljenje privrednog subjekta JP Elektroprivreda BiH d.d. Sarajevo, Vilsonovo šetalište 15, 71000 Sarajevo, Konkurencijsko vijeće Bosne i Hercegovine na 135. (stotinutridesetpetoj) sjednici održanoj dana 10.11.2016. godine, donijelo je

MIŠLJENJE

Privredni subjekt JP Elektroprivreda BiH d.d. Sarajevo, Vilsonovo šetalište 15, 71000 Sarajevo (u daljem tekstu: Podnosilac zahtjeva), podnijelo je Konkurencijskom vijeću Bosne i Hercegovine (u daljem tekstu: Konkurencijsko vijeće) Zahtjev za mišljenje (u daljem tekstu: Zahtjev) dana 04.07.2016. godine zaprimljen pod brojem: 01-26-7-017-I/16.

Podnosilac zahtjeva u bitnom navodi:

- da je JP Elektroprivreda BiH d.d. Sarajevo elektroprivredno društvo registrovano kod Kantonalnog suda u Sarajevu pod brojem UF/I-392/04, koje obavlja djelatnosti: proizvodnje električne i toplotne energije, distribucije električne energije, snabdijevanje električnom energijom, trgovinom električnom energijom i druge djelatnosti utvrđene statutom;
- da je JP Elektroprivreda BiH d.d. Sarajevo organizovano kao dioničko društvo u kojem je Federacija BiH glavni dioničar sa 90,3691% dionica dok je ostatak u vlasništvu tzv. malih dioničara;
- da u svom sastavu ima registrovane podružnice koje obavljaju djelatnost proizvodnje električne energije: Hidroelektrana na Neretvi, J. Černija 1, 88420 Jablanica, Termoelektrana Kakanj, Ćatići, 72240 Kakanj, Termoelektrana Tuzla, 21 aprila 4, 75000 Tuzla kao i podružnice koje obavljaju djelatnost distribucije i snabdijevanja električnom energijom i to: Elektrodistribucija Bihać, Bosanska 25, 77000 Bihać, Elektrodistribucija Mostar, Adema Buća 34, 88000 Mostar, Elektrodistribucija Sarajevo, Zmaja od Bosne 49, 71000 Sarajevo, Elektrodistribucija Tuzla, Rudarska 38, 75000 Tuzla, Elektrodistribucija Zenica, Safvet bega Bašagića 6, 72000 Zenica;
- da ima udjele u sljedećim privrednim društvima rudnika uglja: Rudnik mrkog uglja Kakanj d.o.o., Rudnik mrkog uglja Breza d.o.o., Rudnik mrkog uglja Đurđevik d.o.o., Rudnik mrkog uglja Zenica d.o.o., Rudnik mrkog uglja Abid Lolić d.o.o., Rudnici Kreka d.o.o. Tuzla, i Rudnik uglja Gračanica d.o.o.;
- da je privredni subjekt Rudnici mrkog uglja Banovići d.d. Banovići, Armije BiH 52, 75290 Banovići registrovan kod kantonalnog suda u Tuzli pod brojem: (..)*¹ u obliku dioničkog društva u kojem je dioničar sa 69,30% Federacija BiH a ostatak od 30,70% u privatnom vlasništvu a koje obavlja slijedeće djelatnosti: vađenje lignita, pomoćne djelatnosti za ostalo vađenje ruda i kamena, površinska obrada i prevlačenje metala, ispitivanje terena za gradnju bušenjem i sondiranjem i druge djelatnosti utvrđene statutom;
- da JP Elektroprivreda BiH d.d. Sarajevo i Rudnik mrkog uglja Banovići d.d. Banovići imaju namjeru na osnovu urađenog i revidiranog „Elaborata tehno-ekonomske opravdanosti

¹ (..)*- Podaci predstavljaju poslovnu tajnu

formiranja privrednog društva za proizvodnju i održavanje transportnih sistema u energetsom sektoru u zajedničkom vlasništvu EP BiH i RMU Banovići“ osnovati privredno društvo za proizvodnju i održavanje transportnih sistema u energetsom sektoru;

- da je potpisano „Pismo namjere“ između EP BiH i RMU Banovići kojim je iskazana namjera osnivanja zajedničkog privrednog društva za proizvodnju i održavanje transportnih sistema u energetsom sektoru, čija kopija je i dostavljena Konkurencijskom vijeću;
- da uslijed obavljanja registrovane djelatnosti privrednih društava unutar Koncerna EP BiH (termoelektrane i rudnici) postoji velika potreba za proizvodima u oblasti transportnih sistema, reduktora i pružanja usluga servisiranja opreme, a taj proizvodno-uslužni program bi bila djelatnost budućeg privrednog društva;
- da bi novo privredno društvo bilo formirano u zajedničkom vlasništvu privrednih subjekata JP Elektroprivreda BiH d.d. Sarajevo i RMU Banovići sa većinskim učešćem privrednog subjekta JP Elektroprivreda BiH d.d. Sarajevo od 51%, putem zaključivanja Ugovora o osnivanju privrednog društva koje bi bilo organizovano u obliku društva sa ograničenom odgovornošću;
- da bi djelatnost novog privrednog društva bila proizvodnja i održavanje postrojenja, mašina i uređaja za termoelektrane, rudnike, kamenolome kao i proizvodnja i održavanje postrojenja, mašina i uređaja u drugim granama industrije. Robe, radovi i usluge koje proizilaze iz djelatnosti novog privrednog društva bi bili predmet nabavke privrednih društava u Koncernu JP Elektroprivreda BiH d.d. Sarajevo (termoelektrane i rudnici) i RMU Banovići a u skladu sa Zakonom o javnim nabavkama BiH i Uputstvom o uslovima i načinu na koji sektorski ugovorni organ dodjeljuje ugovore povezanom preduzeću, poslovnom partnerstvu ili sektorskom ugovornom organu koji je sastavni dio poslovnog partnerstva;
- da osnivanje novog privrednog društva nema za posljedicu sprečavanje, ograničavanje ili narušavanje tržišne konkurencije na relevantnom tržištu, već ima kao cilj obezbjeđenje brže i efikasnije nabavke postrojenja, mašina i uređaja i servisiranja postojećih, koje osnivači koriste za obavljanje osnovnih djelatnosti, a što u konačnosti vodi do konkurentnosti djelatnosti proizvodnje električne energije i rudarstva na jedinstvenom energetsom tržištu Jugoistočne Evrope te održavanje stabilne proizvodnje električne energije;
- da bi novi privredni subjekt obavljao djelatnost u oblasti transportnih sistema, reduktora i pružanja usluga servisiranja opreme u mnogim oblastima industrije;
- da bi potencijalni kupci novog privredno subjekta, osim osnivača bili: (..)*²;
- da je ukupan godišnji prihod JP Elektroprivreda BiH d.d. Sarajevo i RMU Banovići d.d. Banovići za godinu koja je prethodila koncentraciji, odnosno za 2015. godinu:

Privredni subjekt	JP EP BiH	RMU Banovići
Ukupan prihod u 2015. godini	(..)* KM	(..)* KM
Prihod od izvoza	(..)* KM	(..)* KM
Razmjena JP EP BiH i RMU Banovići	(..)* KM	(..)* KM

Podnosilac zahtjeva, s obzirom na naprijed navedeno smatra da osnivanjem novog privrednog društva koje bi obavljalo planirane djelatnosti, neće doći do značajnijih promjena na tržištu proizvodnje

² (..)*- Podaci predstavljaju poslovnu tajnu

postrojenja, mašina i uređaja za termoelektrane, rudnike, kamenolome i građevinarstvo te podnosi zahtjev za mišljenje u smislu obaveze podnošenja prijave koncentracije.

Konkurencijsko vijeće na osnovu navoda iz Zahtjeva, uzima u obzir slijedeće odredbe Zakona o konkurenciji i podzakonskih akata:

Član 12. stav (1) tačka c) navodi da se koncentracijom između ostalog *smatra i zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.*

Koncentracijom, u smislu člana 12. stav (1) tačka c) *ne smatra se kad zajedničko ulaganje za cilj ima koordinaciju tržišnih aktivnosti između dva ili više privrednih subjekata koji zadržavaju svoju nezavisnost, pri čemu će ovakvo zajedničko ulaganje biti ocjenjivano u skladu sa članom 4. Zakona o konkurenciji.*

Na osnovu dostavljenih podataka, Konkurencijsko vijeće je ocijenilo da su privredni subjekti, JP Elektroprivreda BiH d.d. Sarajevo i RMU Banovići, u većinskom vlasništvu Federacije BiH (JP Elektroprivreda BiH d.d. Sarajevo – 90,3691% i RMU Banovići – 69,30%), i da isti predstavljaju povezana privredna društva.

Takođe, Konkurencijsko vijeće je ocijenilo da nisu ispunjeni uslovi iz člana 12. stav (1) Zakona, te u tom smislu ne postoji obaveza podnošenja prijave koncentracije.

Ovo Mišljenje, Konkurencijsko vijeće daje isključivo na osnovu podataka navedenih u Zahtjevu, te ukoliko isti odstupaju od stvarnog činjeničnog stanja, isto se ne može primjeniti.

S poštovanjem,

Predsjednica

mr. Arijana Regoda-Dražić